

盤
洲
文
集

盤洲文集卷第二十二

外制四

皇后封贈三代

曾祖吉水簿夏令吉太保

士有戴仁而行抱義而處其道可以致君其材可以
興事而官不過八品職不過黃綬儲休衍慶在其後
人三葉之孫遂母天下則寵綬先廟不一褒而已也
具官某行修于身名播于外恬于榮進漫仕下僚積
盛德而流光致柔儀之鼎貴愍書甚寵已躋亞保之
班郊霈先行庸正三公之冊營魂不昧勿替引之

曾祖母張氏衛國夫人制

國家廣顯親之孝崇告第之澤外庭之宰輔內掖之
妃嬪皆得追榮其三世矧敵體紫宸齊明義曜者哉
某氏懋徽柔之則秉幽靖之儀德配芳圖克恭蘋澗
福流來裔爰正椒塗茲推泰時之恩大開淇奧之壤祿
以象服疊于幽扃

祖穀太傅制

朕登建坤儀助宣王化內有進賢之志歌周南卷耳
之章外無出閭之言矯漢代長秋之獎推慶源之所
自酌愍冊而可行具官某令德藹乎州閭遠識該乎

今古有撥煩理劇之材而不得其位有愛人利物之志而獨善其身集之慈孫儼乎皇極式衍曾沙之祉孰為幽窆之光出帝傳之卹章寵廟祧之時享尚其歆服益右後昆

祖母孫氏蔡國夫人制

朕稽 二祖之 聖謨變一陽之元祀蓋乾德嘗避於近晦淳化始行於上辛茲邊鄙之有興謀著龜而改卜雖神釐之未受豈邦渙之可留某氏性婉而明教賢以肅四德章于女憲六嫔講其壺彝婦道顯融罔專鍾郝之美孫枝甚大遂成陰馬之家申刻蜜之

新封表含飴之積慶其以蔡仲之國用光夏氏之阡
父協太師制

和熹鍾鄧氏之慶不及護羌之存竇后登漢掖之尊
已結觀津之恨茲值邊蠻之事未行郊時之儀預出
恩章敢遺戚畹具官某躬履五常之行氣脩四時之
和抱材不享于修年委祉遂綿于後嗣爰有息女以
升中宮詠任似興周之詩監于彤史法春秋褒紀之
義擬以師垣精爽如存寵光無斁

母趙氏福國夫人制

孔子叙詩以后妃居三百五篇之首塗山娥嬖姜原

任似所以助三代之興也今朕得淑哲以隆內治則
母氏之訓可忘乎某氏莊靚凝姿徽柔繕性出自公
族分玉派之餘輝嬪于德人協鳳鳴之吉兆篤生良
女遂履純坤永懷膝下之慈孰尉宮中之念講陽陔
之慶典開長樂之脂田尚其重泉歆此褒禔

張綬潘景珪賈選大理評事制

廷尉平斷天下之獄而負少事叢慮請讞之稽逗也
益者三人庶無曠職爾等明習律令狹鄉以為言往
充其官思踵平廷之美

唐仲友祕書省正字制

劉晏言天下之文惟朋字未正朕既擢爾父於風霜之地破黨與之私矣爾弟兄鼎立白眉最良登策玉堂奏篇甚善宜居中祕讎校群書歸休從容必無異同之論

王時升權兵部侍郎制

朕招延俊乂列布禁途庶幾獻納論思得厭難折衝之畧咨諏謀度聞安民和衆之言顧武部之闕人稽僉諧而出命具官某秉中庸之德著朴茂之稱版部幹旋合研桑之心計輔藩撫字踵龔召之遺風節費用而府有餘財勤簿領而庭無逋事未奏會稽之最

已勞宣室之恩聚天下之兵朕方修于戎政率夏官之屬爾其治于軍防式埵良圖用禪上策無使立朝之譽減于作郡之時

翟貴妃封贈三代

曾祖世俊太子少保制

國家廣追遠之孝崇告第之恩外則三公上及其曹門內則四妃可覃于初室寵光之渥存沒俱榮某翟方進之孫班婕妤之祖雍容孝弟之行佩服詩書之言既抱器之甚良乃埋光而不耀慶踵來葉儀次中闡茲逢郊類之期先漏泉扃之澤惟春宮之亞保盖

朝路之魏班尚其營魂知此愍冊

曾祖母孫氏齊安郡夫人制

朕郊柴已具邊祲是虞稽皇祖之舊章卜長羸之首
月預行慶典敢後外姻某氏溫靚呈姿柔明宅志佩
悅奉莖蘭之獻錡莒絜蘋藻之羞盛德所延後人鼎
貴繇八月良家之選冠四星天極之躔茲以顯親之
恩得推飾壤之澤褻之象服錫以脂封迺其有知尚
克嘉此

祖思成太子少傅制

朕敷求邦媛光贊坤儀夙有淑聲繼樊衛二姬之行

內無私謁非許史三王之家推厥慶源賁之卹冊某
許高月旦節挺歲寒以利物而存心不逢辰而諾仕
宜篤孫枝之祐遂登妃掖之尊茲有密章用光先廟
亞于儲傳綏彼泉途想其如存服之無斃

祖母張氏和義郡夫人制

朕初虔郊類已戒先庚之期會有塞氛遂移建巳之
月雖神釐之未逆顧邦渙之難稽某氏毓粹名門儼
德君子柔則齊于鍾郝美聲軼于姬姜慶綿再葉之
英位冠四妃之上于沼于汔生能繫于蘋蘩如山如
河沒遂榮于翬翟光靈不昧永庇後人

父益太子少師制

天宮書中宮天極其句四星大者為正妃餘則後宮之屬也王者求河雎之德卷耳之志者使之宣嬪則而應乾象于是有漏泉之澤及其三世之廟顧於顯考不厚可乎某秉青萍之器挺梗桡之材袖手林泉不得其位篤生淑女遂亞柔坤以孝敬而事慈闈以謙約而諧椒屋六寢之間靡人不稱其以官師之冊綏于幽隴以展其報親之心嗚呼休哉

母劉氏咸寧郡夫人制

聖善之愛其女以圖史之戒絜泉箴緼之事諄々焉

誨之于膝下既亂又筭矣廼見其入禁掖登元妃光
大門閭豔于戚畹今也服澣濯之衣以六珈副筭歸
而壽其親不亦榮乎某氏其儀莊靚其德懿柔祀其
先盡執遵之敬事其夫得舉案之恭有女甚賢藹然
內範報厥母訓洊出恩章茲裂宜川之疆式開湯沐
之邑門楣之語驗于是矣

吳益妻趙氏越國夫人制

朕將燔郊燎偶警邊烽祖武可遵嘗講上辛之卜神
心斯荅宜改長羸之初雖未逆于厖禡爰預行于慶
典某氏儀容莊靚德履肅雍母訓少成循八篇列女

之戒壺彞交播為四姓小侯之師蘋蓼絜烝嘗之羞
滫瀡謹尊章之禮如賓有敬偕老則榮茲崇鸞誥之
封益示魚軒之寵越為大國宜兩室家

王述直祕閣宮觀制

冊府上應東壁之躔吾七畧群書充仞棟宇寓其直
則與挾卷拂蟬之士等非系歲月巧宦游者可得也
爾明經博古嫻于文辭一再超遷駁々顯列真之即
位弗安厥居予之郡符旬開愈力以其嘗入諫坡故
貼以美職遂其歸心盖吾于言事之臣常委曲其恩
意如此

李若川權刑部侍郎都督府參贊軍事制

朕慕孝宣綜核之政推帝舜好生之心念畫地為牢
每虞其輕入故吞舟之網寧失于不經眷求時論之
英俾作秋官之貳某性資閎敏談辯縱橫沛然理劇
之材輔以傳家之學久迴翔于外服甫軒翥于近班治
賦版曹弗籠天下之貨贊籌督府能寢淮南之謀身
雖在于戎亭位不虛于禁橐解嚴可異踐職有期立
刑之屬三千在成康而能厝一歲之獄數萬惟于張
而不寃致吾空圖之隆賴汝立朝之效

張運知廣州制

二廣之區五羊最大藥洲蒲澗民有嬉遨之風龍戶
馬人政以撫柔為得此良翰起之叢祠具官某蘊
盤錯之材去表襮之飾法家讞獄解密網之秋茶禁
路理財腐太倉之紅粟把麾而歌袴可嘉念南服
甚遠于朝廷故連率每艱其印綬倘風移俗易令孚
黃木之灣則海宿山行害去綠林之盜往副朕指益
殫厥心

陳正同贈四官制

朕禮優法從恩篤臣鄰晚節挂冠已徇歸田之請一
朝易簪深興移壑之嗟爰有卹章告其居第具官某

風槩方整機猷碩膚蚤騰譽于峻岐遂致身于榮路
貳秋卿之禁橐知勝殘去菽之仁承天旨于籌帷有
排難解紛之助把麾而去歌袴甚休忽驚垂盡之言
空軫云亡之悼增之四秩飾彼九京沒而有知歆此
無斁

潘景直祕閣致仕制

大夫七十而請老古之制也近人耽祿廼鐘鳴漏盡
而不知止吁可歎哉具官某學道洗心聲中其寔蚤
入京都垂上華轍晟府典樂祿臣司光皆當時之選
選退休林壑亦既有年遺榮抽簪無玷終始中祕之

直非賢弗居光爾桑榆用迎壽嘏

李璫常仲循資制

爾淪胥異域久厭腥羶挺然來歸亦著功效進秩有命夸組和門益思盡忠用荅天渙

僉書樞密院錢端禮封贈三代

曾祖暄秦國公制

錢氏有德於吳越之民上天右之宋興二百年間枝曹蕃衍重龜襲紫為搢紳望族運籌帷幄祖孫相繼發祥錫羨厥有自來具官某得傳家之學蘊邁俗之材入聯禁途分司會之劇職出顯方面暢柔遠之英